

Dema bimrim



April 6, 2000

*Dema bimrim, kurê negrî bi ser min da
Mirin naztir bûye îro ji van êşa
Ji ber zor û ji ber lêdana van xeyda
Me dil westî, wekî pîrê li ber kaşa*

*Felek har e, dilê min daye ber kêra
Belengaz û penah bûme li dinyayê
Kovî westa ji ber davan û nêçîra
Pelên dara me weşyane li ber bayê*

*Nema dîsa bi ser xwe bêm, bi yekcarî
Wekî gestim gelek maran ji nişka va
Nema ronî, di çavên min reşe tarî
Dema leylan xuya bûye, ketim dava*

*Şikestî dil di nêçîra xeyalên xwe
Tevî xewn bû, wekî çêrok û efsane
Me tûr vala, li ber dergahê gora xwe
Ewe maxa me ya paşîn û meyxane*

*Dema bimrim, ne pêwîstin gul û hêstir
Mifa nîne ji van girî û lorînan
Mirin wek min, hozanvanin gelek mestir
Bi hesret çûn, ji nav yar û ji nav zînan*

*Bihane hest û helbestên di wan zana
Hema tev çûn, bi xemgînî ketin gorê
Mixabin, çendî dilêşim Ji bo wana
Niha şagird li pey hosta ketî dorê*

*Kurê negrî, wekî min çûn, bi dilêşî
Gelek hêja ji van dostan û van yara
Hozanvan bûn, ketin axê, bi serxweşî
Hinek bêkes, serî danîn, ji xeyda ra*

*Hebûn ustad û pîr zana qelem danîn
Peşîman bûn li jîna xwe di ristê da
Dîlan berdan, bi dilfîxan, gelek nalîn
Vehes dan xwe, cara pêşîn, di gorê da*

*Ejî, wek wan, dema deynim serî carek
Dilê „Cankurd“ vedawşînim ji toza reş
Cîhan dîsa dibe rohnî û bimbarek
Ji we giş nas û yaran re, dibe meyxweş*